

Investar urgentamain en il chapital uman

Il cussegl federal ha laschà elavurar plirs scenaris davart il svilup demografic per la Svizra 2015–2045

DA MARTIN CABALZAR

■ **Ils umans vegnan pli e pli vigls e la cumpart da personas attempadas en nossa societad crescha ad in crescher. Quest svilup demografic na resta dentant betg senza consequenzas sin l'economia e la societad. Il cussegl federal ha preschentà divers scenaris davart il svilup demografic per ils onns 2015 fin 2045.** La populaziun da la Svizra è creschida successivamain da radund 6,5 milliuns l'onn 1985 ed ha cuntanschì 2016 radund 8,3 milliuns. Ils scenaris elavurads per incumbensa dal cussegl federal cumprovan che questa tendenza vegn anc a s'accentuar pli fitg ils proxims onns. Tenor il scenari da referenza vegn la Svizra numnadamain a dumbrar 2045 passa 10 milliuns abitants. Il scenari minimal quinta cun 9,352 milliuns, il scenari maximal cun 11,032 milliuns.

La piramida da vegliadetgna sa mida En il decurs dals proxims 30 onns vegn la piramida da vegliadetgna a sa midar radicalmain. La planta actuala vegn a sa midar en ina spezia d'urna. Tenor tut ils scenaris preschentads s'extenda il spitg da la piramida adina dapli, damai che la generaziun da las annadas grondas va en pensiun e la populaziun vegn adina pli viglia. Tut tenor il dumber da naschientschas s'ingrondescha u sa reducescha il sochel da la piramida. Sco la statistica e la grafica aschuntada tradescha vegn la structura da vegliadetgna a sa midar marcantamain en il decurs dals proxims decennis. La quota creschenta da gliued attempada è d'attribuir d'ina vart a la reducziun marcanta da las naschientschas en ils ultims decennis, da

l'autra vart a las fermas annadas ch'èn naschidas tranter 1950 e 1970. Tras l'augment cuntinuà da las aspectativas da vita cun bleras personas en auta vegliadetgna ha anc rinforzà questas tendenzas. Sin fundament dal dumber da naschientschas che stagnescha sin bass nivel ed il dumber da mortoris che sa reducescha suenter 2045 vegn la cumpart da personas attempadas a restar vinavant auta era sche la generaziun dals uschenumnads «Baby-boomers» na viva betg pli en passa 50 onns. Il scenari da referenza presumescha ch'il dumber d'uffants e giuvenils sut 20 onns vegn er a crescher levamain ils proxims onns d'actualmain 1,67 milliuns sin 1,88 milliuns (2030) e sin 1,9 milliuns (2045).

Svilup demografic e populaziun en il process da lavur

Tenor il cussegl federal vegnan quests facturs demografics er ad influenzar en il decurs dals proxims onns essenzialmain il svilup da la populaziun en il process da lavur. Sin fundament da las prognosas davart la vegliadetgna da la populaziun vegn l'augment da la populaziun che lavura ad esser pli pitschen che l'augment da la populaziun totala e quai independentamain dal scenari tscherni.

La dumonda centrala en quest connex è bain co che la demografia influenzescha il svilup economic en ils pajais industrialisads. Entant che personas giuvnas e personas attempadas han in'influenza negativa vegn l'effect da la gruppa integrada en il process da lavur taxà per positiv. En studi che datescha da l'onn 2015 han ins sviluppa in model teoretic che demonstrescha la correlaziun tranter demogra-

fia, innovaziun ed augment dal product social brut sin fundament da datas empiricas. La conclusiun è clera: La vegliadetgna creschenta da la populaziun e la pitschna quota da naschientschas influenzeschan a moda negativa tant la producziun sco ils tschains reals. La midada da la structura da vegliadetgna n'influzescha betg mo significantamain la tenuta da

spargn, la prontadad da far investiziuns, mabain era la forza d'innovaziun da l'economia. Las personas en il process da lavur han tenor *Ron Schmith* er in effect positiv sin il creschament economic real, ellas èn plitost prontas da far investiziuns, da ristgar insatge ed ellas èn apparentamain era pli interessadas da generar autas renditas. Da quei tut sa resultia ina bassa inflaziun.


En tut ils pajas da la OECD mainian talas midadas da la structura da vegliadetgna ad ina reducziun significanta dal creschament economic e quai tant a media sco a lunga vista. Per la Svizra quinta *Smith* cun ina reducziun annuala da la forza da producziun da radund 0,77 per tschient, quai che correspundia pressapauca a la media dals pajais da la OECD.

Reducziun dal spiert innovativ en la vegliadetgna

Il medem studi pretenda era che la forza ed il spiert innovativ tscheschian cun la vegliadetgna. Uschia derivian las bleras invenziuns che vegnan annunziadas al biro da patentas da personas tranter 40 e 49 onns. Las midadas da la structura da vegliadetgna hajan in'influenza traidubla sin l'economia en general; primo vegnian las investiziuns en il chapital uman ed en la purschida da posts da lavur influenzadas entras midadas da la frequenza da las naschientschas e da la disponibilitad da forzas da lavur. Secundo haja la vegliadetgna er in effect sin las decisiuns d'investiziun e da spargn dals engaschadads en il process da lavur. Terzo haja la cumpart da las personas giuvnas en in team in effect positiv per il process d'innovaziun, scriva *Smith*.

Sviluppar novas strategias politicas ed investar en il chapital uman

Ed el vegn a la sequenta conclusiun: Probabel stoppian ils pajais industrialisads sviluppar e realisar novas strategias politicas per promover il creschament economic che vegnia influenzà fitg da la vegliadetgna creschenta. Probabel stoppian cunzunt era las investiziuns en il chapital uman vegnir augmentadas urgentamain ed a moda significanta.



La piramida da vegliadetgna sa mida marcantamain ils proxims onns ed ha uschia consequenzas significantas sin l'economia.